



Comhairle an
Aontais Eorpaigh

An Bhruiséil, 20 Feabhra 2024
(OR. en)

6776/24

FISC 40
ECOFIN 217

TORADH NA nIMEACHTAÍ

ó:	Ardrúnaíocht na Comhairle
chuig:	An Chomhairle
Uimh. an doic. roimhe seo:	6340/1/24 REV 1 FISC 27 ECOFIN 154
Ábhar:	Conclúidí ón gComhairle maidir le liosta athbhreithnithe an Aontais de dhlínsí neamh-chomhoibríocha chun críoch cánach

Gheobhaidh na toscaireachtaí, san Iarscríbhinn a ghabhann leis seo, na conclúidí ón gComhairle maidir le liosta athbhreithnithe an Aontais de dhlínsí neamh-chomhoibríocha chun críoch cánach, a d'fhormheas an Chomhairle Gnóthaí Ginearálta ag an gcrúinniú a bhí aici an 20 Feabhra 2024.

Conclúidí ón gComhairle

maidir le liosta athbhreithnithe an Aontais de dhlínsí neamh-chomhoibríocha chun críoch cánach

Déanann Comhairle an Aontais Eorpaigh an méid seo a leanas:

1. CUIREANN SÍ I dTREIS a thábhachtaí atá sé caighdeáin dea-rialachais chánach, lena n-áirítear i réimse an chánachais chothroim agus na trédhearcachta cánach, a chur chun cinn agus a neartú, agus calaois chánach, imghabháil cánach agus seachaint cánach a chur chomhrac, ar leibhéal an Aontais agus ar fud an domhain;
2. TUIGEANN SÍ an comhar táirgthe leanúnach i ndáil le cúrsaí cánach idir an Mheitheal um an gCód Iompair maidir le Cánachas Gnó ('an Mheitheal um an gCód Iompair') agus formhór na ndlínsí ar fud an domhain;
3. DEARBHAÍONN SÍ GUR DÍOL SÁSAIMH DI an dul chun cinn atá déanta sna dlínsí ábhartha trí na céimeanna gníomhacha a glacadh faoi na spriocdhátaí a comhaontaíodh, go háirithe maidir le malartú faisnéise arna iarraidh sin, le malartú uathoibríoch faisnéise faoi chuntais airgeadais agus córais chánach dhíobhálacha, agus le ceanglais maidir le substaintí eacnamaíocha a fhorfheidhmiú;

4. DEARBHAÍONN SÍ GURB OTH LÉI go bhfuil roinnt dlínsí fós nach gcomhoibríonn chun críoch cánach agus gur theip ar roinnt dlínsí a ngealltanais i leith na Meithle um an gCód Iompair a chomhlíonadh, lena n-áirítear maidir le malartú uathoibríoch faisnéise faoi chuntais airgeadais (critéar 1.1), malartú faisnéise arna iarraidh sin (critéar 1.2), athchóiriú ar chórais chánach dhíobhálacha faoi chritéar 2.1, nó forfheidhmiú na gceanglas maidir le substaintí eacnamaíocha faoi chritéar 2.2; IARRANN SÍ ar na dlínsí sin oibriú leis an Meitheal um an gCód Iompair chun na saincheisteanna atá fós ann a réiteach;
5. DEARBHAÍONN SÍ GURB OTH LÉI nach bhfuil aon dul chun cinn déanta ag an Tuirc le Ballstát amháin maidir le malartú uathoibríoch faisnéise éifeachtach; IARRANN SÍ AN ATHUAIR ar an Tuirc tús a chur leis na caidrimh maidir le huathmhalartú faisnéise le Ballstát amháin atá fós gan réiteach agus na ceanglais a leagtar amach sna conclúidí ó Chomhairle Ecofin an 22 Feabhra 2021, an 5 Deireadh Fómhair 2021, an 24 Feabhra 2022, an 4 Deireadh Fómhair 2022, an 14 Feabhra 2023 agus an 17 Deireadh Fómhair 2023 a chomhlíonadh ina n-iomláine; ATHDHEARBHAÍONN SÍ gur coinníoll é uathmhalartú éifeachtach faisnéise leis na Ballstáit uile chun go mbeidh critéar 1.1 de liosta an Aontais á chomhlíonadh ag an Tuirc; IARRANN SÍ ar an Meitheal an Chomhairle a chur ar an eolas maidir lena bhfuil ag titim amach i ndáil leis sin agus leanúint d'aghaidh a thabhairt ar na saincheisteanna atá fós gan réiteach i gcás nach bhfuil aon dul chun cinn déanta;
6. FORMHEASANN SÍ an Tuarascáil ón Meitheal um an gCód Iompair a leagtar amach in 6299/2024;

7. FORMHEASANN SÍ dá réir sin liosta athbhreithnithe an Aontais de dhlínsí neamh-chomhoibríocha chun críoch cánach a leagtar amach in Iarscríbhinn I;
8. FORMHUINÍONN SÍ staid na himeartha a leagtar amach in Iarscríbhinn II maidir leis na gealltanais a thug dlínsí comhoibríocha chun caighdeáin dea-rialachais cánach a chur chun feidhme.

Liosta an Aontais de dhlínsí neamh-chomhoibríocha chun críoch cánach

1. Samó Mheiriceá

Ní chuireann Samó Mheiriceá aon uathmhalartú faisnéise airgeadais i bhfeidhm, níor shínigh sé ná níor dhaingnigh sé, lena n-áirítear tríd an dlínse a bhfuil siad ag brath uirthi, an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, níl gealltanais tugtha aige na híoschaighdeáin maidir le creimeadh an bhoinn agus aistriú brabúis (íoschaighdeáin BEPS) a chur i bhfeidhm ná níl gealltanais tugtha aige go dtabharfaí aghaidh ar na saincheisteanna sin.

2. Angaile

Níl rátáil ‘mórchomhlíontach’ ar a laghad ag Angaile ón bhFóram Domhanda i ndáil le malartú faisnéise arna iarraidh sin. Éascaíonn Angaile struchtúir agus socruithe easchósta chomh maith atá dírithe ar bhrabúis a mhealladh gan fíorshubstaint eacnamaíoch ós rud é nach ndéanann sé gach gníomhaíocht is gá chun cur chun feidhme éifeachtach na gceanglas maidir le substaintí faoi chritéar 2.2 a áirithiú.

3. Antigua agus Barbúda

Níl rátáil ‘mórchomhlíontach’ ar a laghad ag Antigua agus Barbúda ón bhFóram Domhanda i ndáil le malartú faisnéise arna iarraidh sin.

4. Fidsí

Níor shínigh Fidsí ná níor dhaingnigh sí an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, tá córais chánach fhabhracha dhíobhálacha aici (cuideachtaí onnmhairiúcháin, dreasacht na dteicneolaíochtaí cumarsáide ioncaim, ráta lamháltais cánach do cheanncheathrú réigiúnach nó domhanda), níl sí ina comhalta den Chreat Cuimsitheach ná níor chuir sí íoschaighdeáin BEPS i bhfeidhm agus níl na saincheisteanna sin réitithe go fóill aici.

5. Guam

Ní chuireann Guam aon uathmhalartú faisnéise airgeadais i bhfeidhm, níor shínigh sé ná níor dhaingnigh sé, lena n-áirítear tríd an dlínse a bhfuil sé ag brath uirthi, an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, níl gealltanais tugtha aige íoschaighdeáin BEPS a chur i bhfeidhm ná níl gealltanais tugtha aige go dtabharfaí aghaidh ar na saincheisteanna sin.

6. Oileáin Palau

Ní chuireann Oileáin Palau aon uathmhalartú faisnéise airgeadais i bhfeidhm, níor shínigh siad ná níor dhaingnigh siad an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, agus níl na saincheisteanna sin réitithe go fóill acu.

7. Panama

Níl rátáil ‘mórchomhlíontach’ ar a laghad ag Panama ón bhFóram Domhanda i ndáil le malartú faisnéise arna iarraidh sin, tá córas díolúine díobhálach maidir le hioncaim ó fhoinsí eachtracha aige, agus níl na saincheisteanna sin réitithe go fóill aige.

8. Cónaidhm na Rúise

Tá córas cánach fabhrach díobhálach ag Cónaidhm na Rúise (cuideachtaí sealbhaíochta idirnáisiúnta) agus níl an tsaincheist sin réitithe go fóill aici.

9. Samó

Tá córas cánach fabhrach díobhálach ag Samó (cuideachta easchósta) agus níl an tsaincheist sin réitithe go fóill aige.

10. Oileán na Tríonóide agus Tobága

Níl rátáil ‘mórchomhlíontach’ ar a laghad ag Oileán na Tríonóide agus Tobága ón bhFóram Domhanda i ndáil le faisnéis a mhalartú arna iarraidh sin, níor shínigh sé ná níor dhaingnigh sé Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, tá córais chánach fhabhracha dhíobhálacha aige (criosanna saorthrádála), ní chuireann sé íoschaighdeán BEPS maidir le tuairisciú de réir tíre chun feidhme agus níl na saincheistean sin réitithe aige go fóill.

Tá gealltanais tugtha ag Oileán na Tríonóide agus Tobága freisin aghaidh a thabhairt ar mholtaí an Fhóraitm Dhomhanda maidir le huathmhalartú faisnéise (critéar 1.1) in am trátha, chun go mbainfear amach rátáil ‘i bhfeidhm, ach feabhas ag teastáil’, ar a laghad, i gcás phríomhcheanglais 1 agus 2 i dtuarascáil athbhreithnithe piaraí an Fhóraitm Dhomhanda i bhfómhar 2024.

11. Ógh-Oileáin na Stát Aontaithe

Ní chuireann Ógh-Oileáin na Stát Aontaithe aon uathmhalartú faisnéise airgeadais i bhfeidhm, níor shínigh siad ná níor dhaingnigh siad, lena n-áirítear tríd an dlínse a bhfuil siad ag brath uirthi, an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, tá córais chánach fhabhracha dhíobhálacha acu (clár forbartha eacnamaíche, cuideachtaí díolmhaithe, gníomh rialála ionaid baincéireachta idirnáisiúnta), níl gealltanais tugtha acu íoschaighdeáin BEPS a chur i bhfeidhm ná níl gealltanais tugtha acu go dtabharfaí aghaidh ar na saincheisteanna sin.

12. Vanuatú

Éascaíonn Vanuatú struchtúir agus socruithe easchósta atá dírithe ar bhrabúis a mhealladh gan fíorshubstaint eacnamaíoch, agus níl an tsaincheist sin réitithe go fóill aige.

Tá Vanuatú ag fanacht le hathbhreithniú forlíontach ón bhFóram Domhanda i ndáil le malartú faisnéise arna iarraidh sin.

Staid na himeartha maidir leis an gcomhar leis an Aontas i ndáil le gealltanais a thug dlínsí comhoibríocha chun prionsabail an dea-rialachais cánach a chur chun feidhme

1. Trédhearcacht

1.1 Uathmhalartú faisnéise

Meastar go ndéanfaidh an dlínse seo a leanas faisnéis a mhalartú go héifeachtach leis na 27 mBallstát uile de réir na hamlíne dá dtagraítear i mír 6 de na Conclúidí ón gComhairle an 22 Feabhra 2021, mír 4 de na Conclúidí ón gComhairle an 5 Deireadh Fómhair 2021, mír 4 de na Conclúidí ón gComhairle an 24 Feabhra 2022, mír 4 de na Conclúidí ón gComhairle an 4 Deireadh Fómhair 2022 agus mír 7 de na Conclúidí ón gComhairle an 14 Feabhra 2023 agus mír 7 de na Conclúidí ón gComhairle an 17 Deireadh Fómhair 2023:

An Tuirc

Thug na dlínsí seo a leanas gealltanais aghaidh a thabhairt ar mholtaí an Fhóraitm Dhomhanda maidir le huathmhalartú faisnéise in am trátha, chun go mbainfear amach an rátáil ‘i bhfeidhm, ach feabhas ag teastáil’ ar a laghad maidir le príomhcheanglais 1 agus 2 i dtuarascáil athbhreithnithe piaraí an Fhóraitm Dhomhanda i bhfómhar 2024:

Cósta Ríce agus Cúrasó

1.2 Comhaltas san Fhóram Domhanda agus rátáil shásúil i ndáil le malartú faisnéise arna iarraidh sin

Tá na dlínsí seo a leanas ag fanacht ar athbhreithniú forlíontach ón bhFóram Domhanda:

An Bheilís, Oileáin Bhriotanacha na Maighdean agus na Séiséil

2. Cánachas Cothrom

2.1 Córais chánach dhíobhálacha atá ann

Maidir leis an dlínse seo a leanas, a thug gealltanais a chórais díolúine díobhálach maidir le hioncaim ó fhoinsí eachtracha a leasú nó a dhíothú faoi dheireadh 2022 agus a léirigh go ndearnadh dul chun cinn nithiúil leis na hathchóirithe sin in 2022 agus 2023, tugadh go dtí an 31 Márta 2024 di a reachtaíocht maidir leis an gcaoi a ndéileáiltear le gnóthachain chaipitiúla a oiriúnú:

An Mhalaeisia

Tá na dlínsí seo a leanas, a thug gealltanais a gcórais chánach fhabhracha dhíobhálacha a leasú nó a dhíothú faoi raon feidhme an Fhórais maidir le Cleachtais Chánach Dhíobhálacha faoin 31 Nollaig 2023, ag feitheamh le measúnuithe críochnaitheacha ag an bhFóram:

An Airméin (saorchriosanna eacnamaíocha) agus Easuaítíní (crios eacnamaíoch speisialta)

3. Creimeadh an bhoinn agus aistriú brabúis (BEPS) a chosc

3.2 Cur chur chun feidhme íoschaighdeán CbCR (Gníomhaíocht BEPS 13)

Thug an dlínse seo a leanas gealltanais íoschaighdeán CbCR a chur chun feidhme agus caidreamh malartaithe CbCR le Ballstáit uile an Aontais a ghníomhachtú de réir an spriocdháta a comhaontaíodh (faoin 31 Lúnasa 2024):

An Vítneam
